

Sed in hoc deceptus est Leo. quod terminum Africæ non posuerit Mare rubrum, sed Nilum: quo factum est, ut Ægyptum & reliquam partem Orientalis Asiæ adjudicârit: Nos igitur præter quatuor illas partes à Leone enumeratas ponimus in Africa *Ægyptum, Æthiopiam superiorem sive interiorem*, in qua Abyssini: *Æthiopiam inferiorem sive exteriorem* in qua Manicongi, & *Insulas*. *Ægyptus* ab Austro in Boream longo tractu porrigitur. Termini sunt ab Occidente ultra Nilum deserta Barce, Libyæ & Numidiæ, cum regno Nubiæ. Ab Austro agro Bugiensi & Nilo concluditur, quo loco Nilus ab Occasu in Ortum nonnihil fertur. Ab Ortum sunt deserta Arabiæ, quæ inter Ægyptum & Mare Rubrum sita sunt. Ab Aquilone clauditur Mari Mediterraneo. Cetera de Ægypto in singulari eius descriptione explicabimus. *Barbariam* hodie vocant totum Africæ tractum ab Ægypto ad Fretum Gaditanum, qui Mari Mediterraneo & Atlante monte concluditur, continetque Regna Marocci, Fessæ, Teleusinum, Tunetanum, & Barcæ, de quibus fusiùs in Barbariæ descriptione. Nunc satis fuerit Lectori limites commonstrasse. *Regnum* itaque *Marocci* dividitur in has provinciâs, *Heam, Susam, Guzulam, Marocci terram, Ducalam, Hoscoram & Tedletem*: Terminatur Oceano Atlantico, Atlante ipso, & Regno Fessæ. *Regnum Fessanum* ob Occasu habet Mare Atlanticum, à Septentrione Fretum Herculeum, ab Ortum Mulviam flumen, ab Austro *Regnum Marrocci*: eius regiones sunt *Temefna, Territorium Fessæ, Asgara, Elhabata, Errisa, Garetum, & Elchausum, Teleusinum Regnum* quod & *Tremisen* vocant, terminatur à Meridie deserto Numidiæ: ab Ortum fluvio Majore, à Septentrione Mari Mediterraneo. *Regnum Tunetanum* complectitur totum Terræ tractum à fluvio Majori ad Mesratæ Regionis amnem. Eius Regiones sunt quinque, *Bugia, Constantina, Tunetanum territorium, Tripolis, & Ezzaba*. *Barca* seu *Barcha* à finibus Mesratæ protenditur ad Ægypti confinia. *Numidia* hodie *Biledulgerid* dicitur. Eius fines ab Occidente Mare Atlanticum, à Septentrione Mons Atlas, ad Ortum Ægypti confinia, ab Austro deserta Libyæ. Regiones *Tesset, Segelmessa, Seb, Biledulgerid, Dara & Fezzen*. *Libya* veteribus Sarra dicta, quod deserta sit, Initium eius à Gaogæ Regno prope Nilum, exporrigiturque Occidentem versus, ad Regnum usque Gualatæ quod Atlantico Mari adjacet, à Septentrione Numidiæ Regno cotermina est, à Meridie Nigritarum. *Nigrita* dicuntur vel ab incolarum colore nigro, vel potius à flumine Nigro, quod hanc regionem lambit. Habent ab Ortum Nili confinia: ab Occasu Oceanum Occiduum: à Meridie partim Mare Æthiopicum, partim Regnum Manicongi: à Septentrione verò Libyæ deserta. Regna eorum sunt quinque & viginti. *Galata, Guinea, Melli, Tombutum, Gago, Guber, Agadez, Cano, Casena, Zegzeg, Zanfara, Gunangara, Bornum, Goago, Nubia, Biro, Temiamo, Dauma, Medra, Goram, Territorium, Anterotense, Territorium Gialofa, Ora Guinea, Territorium Melegense, & Regnum Benin*. *Abyssini* incolunt Superiorem sive Interiorem Æthiopiam, quorum Princeps Prete Gianni dicitur. Eius regio per ampla, utrumque pene Tropicum contingit, extenditurque inter Oceanum Æthiopicum & Mare Rubrum. A Septentrione habet Nubiæ & Bugiæ populos Ægypto confines. Ab Ortum Mare Rubrum, à Meridie Lunæ montes, ab Occasu Regnum Manicongi, Nigrum amnem, Nubiæ Regnum & fluvium Nilum. Regna ei subjecta hæc, *Barnagnes sive Barnagassum, Tigremanum, Tigrai* in qua urbs *Caxumo, Angote, Amara, Xea, Gojami, Bagamedrum, Gueguere, Fatiagar, Damur, Dancali,*